

四庫全書

集部

欽定四庫全書

御定全唐詩錄卷四十六

韓愈

愈字退之鄧州南陽人生三歲而孤隨伯兄會貶
官嶺表會卒嫂鄭鞠之愈自知讀書日記數千百
言比長盡能通六經百家學擢進士第會董晉為
宣武節度使表署觀察推官晉卒依武寧節度使
張建封建封辟府推官操行堅正鯁言無所忌調

四門博士遷監察御史上疏極論宮市德宗怒貶
陽山令有愛在民民生子多以其姓字之改江陵
法曹叅軍元和初權知國子博士分司東都三歲
為真改都官員外郎即拜河南令遷職方員外郎
坐柳澗事復為博士改比部郎中史館修撰轉考
功知制誥進中書舍人論淮西事執政不喜改太
子右庶子裴度宣慰淮西奏愈行軍司馬元濟平
遷刑部侍郎憲宗迎佛骨入禁中上表力諫帝大

怒持示宰相將抵以死裴度崔羣及戚里諸貴皆
為愈言乃貶潮州刺史尋改袁州召拜國子祭酒
轉兵部侍郎鎮州亂詔愈宣撫愈歸轉吏部侍郎
時宰相李逢吉惡李紳欲逐之遂以愈為京兆尹
兼御史大夫特詔不臺參而除紳中丞紳果劾奏
愈愈以詔自解其後文刺紛然宰相以臺府不協
遂罷愈為兵部侍郎而出紳江西觀察使紳見帝
得留愈亦復為吏部侍郎卒年五十七贈禮部尚

書謚曰文

續世說云韓愈與人交榮悴不易而觀諸權門豪士如僕隸焉瞪然不顧穆宗以愈為京兆尹六軍不敢犯法私相謂曰是尚欲燒佛骨何可犯之佳話錄云韓十八愈直是太輕薄謂李二十六程曰某與丞相崔大羣同年往還直是聰明過人李曰何處是過人者韓曰共愈往還二十餘年不曾共說著文章此豈不是敏慧過人也

古體詩

元和聖德詩

并序

臣愈頓首再拜言臣伏見皇帝陛下即位已來
誅流姦臣朝廷清明無有欺蔽外斬楊惠琳劉
闢以收夏蜀東定青徐積年之叛海內怖駭不
敢違越郊天告廟神靈歡喜風雨晦明無不從
順太平之期適當今日臣蒙被恩澤日與羣臣
序立紫宸殿陛下親望穆穆之光而其職業又在

以經籍教導國子誠宜率先作歌詩以稱道盛
德不可以辭語淺薄不足以自效為解輒依古
作四言元和聖德詩一篇凡千有二十四字指
事實錄具載明天子文武神聖以警動百姓耳
目傳示無極其詩曰

皇帝即阼物無違拒曰暘而暘曰雨而雨維是元年有
盜在夏欲覆其州以踵近武皇帝曰嘻豈不在我負鄙
為艱縱則不可出師征之其衆十旅軍其城下告以福

禍腹敗枝披不敢保聚擲首陴外降幡夜豎疆外之險
莫過蜀土韋臯去鎮劉闢守後血人于牙不肯吐口開
庫啗士曰隨所取汝張汝弓汝鼓汝鼓汝為表書求我
帥汝事始上聞在列咸怒皇帝曰然嗟遠士女苟附而
安則且付與讀命于庭出節少府朝發京師夕至其部
闢喜謂黨汝振而伍蜀可全有此不當受萬牛鬻炙萬
甕行酒以錦纏股以紅帕首有恆其兇有餌其誘其出
穰穰隊以萬數遂劫東川遂據城阻皇帝曰嗟其又可

許爰命崇文分卒禁禦有安其驅無暴我野日行三十
徐壁其右闕黨聚謀鹿頭是守崇文奉詔進退規矩戰
不貪殺擒不濫數四方節度整兵頓馬上章請討俟命
起坐皇帝曰嘻無汝煩苦荆并洎梁在國門戶出師三
千各選爾醜四軍齊作殷其如阜或拔其角或脫其距
長驅洋洋無有齟齬八月壬午闕棄城走載妻與妾包
裹稚乳是日崇文入處其宇分散逐捕搜原剔藪闕窮
見窘無地自處俯視大江不見洲渚遂自顛倒若杵投

白取之江中枷脰械手婦女纍纍啼哭拜叩來獻闕下
以告廟社周示城市咸使觀覩解脫繫索夾以砧斧婉
婉弱子赤立偃僂牽頭曳足先斷腰脅次及其徒體骸
撐拄末乃取闕駭汗如寫揮刀紛紜爭刳膾脯優賞將
吏扶珪綴組帛堆其家粟塞其庾哀憐陣歿廩給孤寡
贈官封墓周帑宏溥經戰伐地寬免租簿施令酬功急
疾如火天地中間莫不順序幽恒青魏東盡海浦南至
徐蔡區外雜虜恒威赧德跼蹐蹈舞掉棄兵革私習簋

簠來請來覲十百其耦皇帝曰吁伯父叔舅各安爾位
訓厥眊晦正月元日初見宗祖躬執百禮登降拜俯薦
于新宮視瞻梁杞感見顏色淚落入俎侍祠之臣助我
惻楚乃以上辛於郊用牡除于國南鱗筍毛簠廬幕周
施開揭磊砢獸盾騰拏圓壇帖妥天兵四羅旂常婀娜
駕龍十二魚魚雅雅宵昇于丘奠璧獻聿衆樂驚作轟
飗融冶紫焰噓呵高靈下墮羣星從坐錯落侈哆日君
月妃煥赫嫗姬瀆鬼濛鴻嶽祗業我飫沃羶薌產祥降

嘏鳳凰應奏舒翼自拊赤麟黃龍透蛇結糾卿士庶人
黃童白叟踴躍歡呀失喜噎歐乾清坤夷境落褰舉帝
車迴來日正當午幸丹鳳門大赦天下滌濯剗磔磨滅
瑕垢續功臣嗣拔賢任耆孩養無告仁滂施厚皇帝神
聖通達今古聽聰視明一似堯禹生知法式動得理所
天錫皇帝為天下主并包畜養無異細鉅億載萬年敢
有違者皇帝儉勤盥濯陶瓦斥遣浮華好此綈紵敕戒
四方侈則有咎天錫皇帝多麥與黍無名水旱耗于雀

鼠億載萬年有富無窶皇帝正直別白善否擅命而狂
既翦既去盡遂羣姦靡有遺侶天錫皇帝庀臣碩輔博
問遐觀以置左右億載萬年無敢侮皇帝大孝慈祥
悌友怡怡愉愉奉太皇后決于族親濡及九有天錫皇
帝與天齊壽登茲太平無怠永久億載萬年為父為母
博士臣愈職是訓詁作為歌詩以配吉甫

剝啄行

剝剝啄啄有客至門我不出應客去而嗔從者語我子

胡為然我不厭客困于語言欲不出納以堙其源空堂
幽幽有桔有莞門以兩版叢書於間窅窅深塹其墉甚
完彼寧可隳此不可干從者語我嗟子誠難子雖云爾
其口益蕃我為子謀有萬其全凡今之人急名與官子
不引去與為波瀾雖不開口雖不開闔變化咀嚼有鬼
有神今去不勇其如後艱我謝再拜汝無復云徃追不
及來不有年

公被讒出令陽山至是召還又有謗之者
故三星行云名聲相乘除得少失有餘剝

啄行云我不厭客困于語言不欲出納以堙其源各有
所激云爾歐陽文忠擬剝啄行寄趙少師云剝剝復啄

啄柴門驚鳥雀故人千里駕信士百金諾云然公遠
讒避謗欲謝客以埋其源故深其壑堅其墉要為不可
干者而歐陽則歸老故鄉欣然
喜客之至是以其辭不同如此

琴操

將歸操 孔子之趙聞殺鳴犢作

狄之水兮其色幽幽我將濟兮不得其由涉其淺兮石
齧我足乘其深兮龍入我舟我濟而悔兮將安歸尤歸
兮歸兮無與石關兮無應龍求

倚蘭操 孔子傷不逢時作

蘭之猗猗揚揚其香不採而佩於蘭何傷今天之旋其
曷為然我行四方以日以年雪霜貿貿薺麥之茂子如
不傷我不爾覲薺麥之茂薺麥之有君子之傷君子之
守

拘幽操 文王羑里作

目窈窈兮其凝其眇耳肅肅兮聽不聞聲朝不日出兮
夜不見月與星有知無知兮為死為生嗚呼臣罪當誅
今天王聖明

履霜操

尹吉甫子伯奇無罪為後母譖而見逐

自傷作

父兮兒寒母兮兒飢兒罪當答逐兒何為兒在中野以
宿以處四無人聲誰與兒語兒寒何衣兒飢何食兒行
于野履霜以足母生衆兒有母憐之獨無母憐兒寧不
悲

雉朝飛操

牧犢子七十無妻見雉雙飛感之而

作

雉之飛于朝日羣雌孤雄意氣橫出當東而西當啄而
飛隨飛隨啄羣飛粥粥嗟我雖人曾不如彼雉雞生身
七十年無一妾與妃

別鵲操 商陵穆子娶妻五年無子父母欲其改
娶其妻聞之中夜悲嘯穆子感之而作

雄鵲銜枝來雌鵲啄泥歸巢成不生子大義當乖離江
漢水之大鵲身鳥之微更無相逢日且可繞樹相隨飛

南山詩

吾聞京城南茲惟羣山囿東西兩際海巨細難悉究山
經及地志茫昧非受授團辭試提挈挂一念萬漏欲休
諒不能粗叙所經觀嘗昇崇丘望戢戢見相湊晴明出
稜角縷脈碎分繡蒸嵐相瀕洞表裡忽通透無風自飄
簸融液煦柔茂橫雲時平凝點點露數岫天空浮修眉
濃綠畫新就孤撐有巉絕海浴褰鵬喙春陽潛沮洳濯
濯吐深秀巖巒雖律卒輒弱類含酎夏炎百木盛蔭鬱
增埋覆神靈日歔歔雲氣爭結構秋霜喜刻轢磔卓立

癯瘦叅差相疊重剛耿陵宇宙冬行雖幽墨水雪工琢
鏤新曦照危峨億丈恒高袤明昏無停態頃刻異狀候
西南雄太白突起莫間簞藩都配德運分宅占丁戊逍
遙越坤位詆訐陷乾實空虛寒兢兢風氣較搜漱朱維
方燒日陰霰縱騰糅昆明大池北去覲偶晴晝縣聯窮
俯視倒側困清漚微瀾動水面踊躍躁猱狖驚呼惜破
碎仰喜呀不仆前尋徑杜墅全蔽畢原陋崎嶇上軒昂
始得觀覽富行行將遂窮嶺陸煩互走勃然思坼裂擁

掩難恕宥巨靈與夸蛾遠賈期必售還疑造物意固護
蓄精祐力雖能排幹雷電怯呵詬攀緣脫手足蹭蹬抵
積甃茫如試矯首塢塞生恂愁威容喪蕭爽近新迷遠
舊拘官計日月欲進不可又因緣窺其湫凝湛閱陰罍

罍音

魚鰕可俯掇神物安敢寇林柯有脫葉欲墮鳥驚

救爭銜彎環飛投棄急哺轂旋歸道迴睨達枿壯復奏
吁嗟信奇恠峙質能化貿前年遭譴謫探歷得邂逅初
從藍田入顧眄勞頸脰時天晦大雪淚目苦矇眊峻塗

拖長冰直上若懸溜褰衣步推馬顛蹶退且復蒼黃忘
遐睎所矚繞左右杉篁咤蒲蘓杲耀攢介冑專心憶平
道脫險逾避臭昨來逢清霽宿願忻始副崢嶸躋冢頂
倏閃雜魑魍前低劃開濶爛漫堆衆皴或連若相從或
感若相關或妥若弭伏或竦若驚雉或散若瓦解或赴
若輻湊或翩若舩遊或決若馬驟或背若相惡或向若
相佑或亂若抽筍或嶮若注灸或錯若繪畫或繚若篆
籀或羅若星離或翳若雲逗或浮若波濤或碎若鋤耨

或如賁育倫賭勝勇前購先強勢已出後鈍嗔詎譎

音關

耨

或如帝王尊叢集朝賤幼雖親不褻狎雖遠不悖謬

或如臨食案肴核紛飮飪又如遊九原墳墓包槨柩或
累若盆甕或揭若甌杓或覆若曝鼈或顏若寢獸或蜿
若藏龍或翼若搏鷲或齊若友朋或隨若先後或迸若
流落或顧若宿留或戾若仇讐或密若婚媾或儼若峨
冠或翻若舞袖或屹若戰陣或圍若蒐狩或靡然東注
或偃然北首或如火熔焰或若氣饋餉或行而不輟或

遺而不收

易井收勿
幕音符

或斜而不倚或弛而不彀或赤若

禿簡或燠若柴樵或如龜坼兆或若卦分繇

音宙

或前橫

若剝或後斷若垢延離又屬夬夬叛還遘喁喁魚闔

萍落落月經宿閭閭樹墻垣巘巘架庫廡參參削劍戟

煥煥銜瑩琇敷敷花披萼闐闐屋摧雷悠悠舒而安兀

兀狂以狙超超出猶奔蠢蠢駭不懋大哉立天地經紀

肖營騰厥初孰開張僊僊誰勸侑創茲朴而巧戮力忍

勞疲得非施斧斤無乃假詛咒鴻荒竟無傳功大莫酬

儼嘗聞於祠官芬苾降歆嗅斐然作歌詩惟用贊報醑
謝自然詩

果州南充縣寒女謝自然童騷無所識但聞有神仙輕
生學其術乃在金泉山繁華榮慕絕父母慈愛捐凝心
感魑魅恍惚難具言一朝坐空室雲霧生其間如聆笙
竽韻來自冥冥天白日變幽晦蕭蕭風景寒簷楹甍明
滅五色光屬聯觀者徒傾駭躑躅詎敢前須臾自輕舉
飄若風中煙茫茫八紘大影響無由緣里胥上其事郡

守驚且歎驅車領官吏毗俗爭相先入門無所見冠屨
同蛻蟬皆云神仙事灼灼信可傳余聞古夏后象物知
神姦山林民可入魍魎莫逢旃逖迤不復振後世恣欺
謾幽明紛雜亂人鬼更相殘秦皇雖篤好漢武洪其源
自從二主來此禍竟連連木石生恠變狐狸騁妖患莫
能盡性命安得更長延人生處萬類知識最為賢奈何
不自信反欲從物遷往者不可悔孤魂抱深冤來者猶
可誠余言豈空文人生有常理男女各有倫寒衣及飢

食在紡績耕耘下以保子孫上以奉尊親苟異於此道
皆為棄其身噫乎彼寒女永託異物羣感傷遂成詩昧
者宜書紳

秋懷詩

牕前兩好樹衆葉光蕤蕤秋風一披拂策策鳴不已微
燈照空牀夜半偏入耳愁憂無端來感歎成坐起天明
視顏色與故不相似義和驅日月疾急不可恃浮生雖
多塗趨死惟一軌胡為浪自苦得酒且歡喜

白露下百草蕭蘭共雕悴青青四墻下已復生滿地寒
蟬暫寂寞蟋蟀鳴自恣運行無窮期稟受氣苦異適時
各得所松栢不必貴

秋氣日惻惻秋空日凌凌上無枝上蛸下無盤中蠅豈
不感時節耳目去所憎清曉卷書坐南山見高稜其下
澄秋水有蛟寒可翫惜哉不得往豈謂吾無能

離離掛空悲感感抱虛警露泣秋樹高蟲弔寒夜永斂
退就新儒趨營悼前猛歸愚識夷塗汲古得修綆名浮

猶有恥味薄真自幸庶幾遺悔尤即此是幽屏

秋夜不可晨秋日苦易暗我無汲汲志何以有此憾寒
雞空在棲缺月煩屢瞰有琴具微絃再鼓聽愈淡古聲
久埋滅無由見真濫低心逐時趨苦勉祇能慙有如乘
風船一縱不可纜不如覩文字丹鉛事點勘豈必求羸
餘所要石與甌

卷卷落地葉隨風走前軒鳴聲若有意顛倒相追奔空
堂黃昏暮我坐默不言童子自外至吹燈當我前問我

我不應饋我我不餐退坐西壁下讀詩盡數編作者非今
士相去時已千其言有感觸使我復悽酸顧謂汝童子
置書且安眠丈人屬有念事業無窮年

霜風侵梧桐衆葉着樹乾空階一片下琤若摧琅玕謂
是夜氣滅望舒實其團青冥無依倚飛轍危難安驚起
出戶視倚楹久汎瀾憂愁費晷景日月如跳丸迷復不
計遠為君駐塵鞍

鮮鮮霜中菊旣晚何用好揚揚弄芳蝶爾生還不早運

窮兩值遇婉嬖死相保西風蟄龍蛇衆木日凋槁由來
命分爾泯滅豈足道

赴江陵途中寄贈王二十補闕

涯

李十一拾遺

建

李二十六員外

程

翰林三學士

孤臣昔放逐血泣追愆尤汗漫不省識恍如乘桴浮或
自疑上疏上疏豈其由是年京師旱田畝少所收上憐
民無食征賦半已休有司恤經費未免煩徵求富者既
云急貧者固已流傳聞閭里間赤日棄渠溝持男易斗

粟掉臂莫肯酬我時出衢路餓者何其稠親逢道邊死
佇立久呻吟歸舍不能食有如魚中鉤適會除御史誠
當得言秋拜疏移閤門為忠寧自謀上陳人疾苦無令

絕其喉

一作
鞋

下陳畿甸內根本理宜優積雪驗豐熟幸

寬待蠶麤天子惻然感司空歎綢繆謂言即施設乃返
遷炎州同官盡才俊偏善柳與劉或慮語言洩傳之落
寬讐二子不宜爾將疑斷還不中使臨門遣頃刻不得
留病妹卧牀褥分知隔明幽悲啼乞就別百請不領頭

弱妻抱稚子出拜忘慙羞僂僂不迴顧行行詣連州朝
為青雲士暮作白首囚商山季冬月冰凍絕行輶春風
洞庭浪出沒驚孤舟逾嶺到所任低顏奉君侯酸寒何
足道隨事生瘡疣遠地觸途異吏民似猿猴生獐多忿
狼辭舌紛嘲啁白日屋簷下雙鳴鬪鵲鷗有蛇類兩首
有蟲一作羣飛游窮冬或搖扇盛夏或重裘颺起最可
畏司哮簸陵丘雷霆助光怪氣象難比侔癘疫忽潛遘
十家無一瘳猜嫌動置毒對案輒懷愁前日遇恩赦私

心喜還憂果然又羈縻不得歸
勑勑此府雄且大騰凌
盡戈矛棲棲法曹掾何處事卑陬
生平企仁義所學皆
孔周早知大理官不列三后儔
何況親犴獄敲榜發姦
偷懸知失事勢恐自罹置杲湘水清
且急涼風日修修
胡為首歸路旅泊尚夷猶
昨者京師至嗣皇傳冕旒赫
然下明詔首罪誅共古兜受
復聞顛天輩古兜冠進鴻疇
班行再肅穆璜珮鳴琅璆
佇繼貞觀烈遣封脫兜登三
賢推侍從卓犖傾枚鄒
高議叅造化清文煥皇猷
協心

輔齊聖政理同毛輶小雅咏鳴鹿食苹貴呦呦遺風邈
不嗣豈憶嘗同稠失志早衰換前期擬蜉蝣自從齒牙
缺始慕舌為柔因疾鼻又塞漸能等薰蕕深思罷官去
畢命依松楸空懷焉能果但見歲已邁殷湯閔禽獸解
網祝蛛蝥雷煥掘寶劍冤氛銷斗牛茲道誠可尚誰能
借前籌殷勤謝吾友明月非暗投

江漢答孟郊

江漢雖云廣乘舟渡無艱流沙信難行馬足常往還淒

風結衝波狐裘能禦寒終宵處幽室華燭光爛爛苟能
行忠信可以居夷蠻嗟余與夫子此義每所敦何為復
見贈繾綣在不諼

長安交遊者贈孟郊

長安交遊者貧富各有徒親朋相過時亦各有以娛陋
室有文史高門有笙竽何能辨榮悴且欲分賢愚

北極贈李觀

北極有羈羽南溟有沈鱗川原浩浩隔影響兩無因風

雲一朝會變化成一身誰言道里遠感激疾如神我年
二十五求友昧其人哀歌西京市乃與夫子親所尚苟
同趨賢愚豈異倫方為金石姿萬世無緇磷無為兒女
態憔悴悲賤貧

此日足可惜贈張籍

此日足可惜此酒不足嘗捨酒去相語共分一日光念
昔未知子孟君自南方自矜有所得言子有文章我名
屬相府欲往不得行思之不可見百端在中腸維時月

鬼死冬日朝在房驅馳公事退聞子適及城命車載之
至引坐于中堂開懷聽其說往往副所望孔丘歿已遠
仁義路久荒紛紛百家起詭怪相披猖長老守所聞後
生習為常少知誠難得純粹古已亡譬彼植園木有根
易為長留之不遣去館置城西旁歲時未云幾浩浩觀
湖江衆夫指之笑謂我知不明兒童畏雷電魚鼈驚夜
光州家舉進士選試繆所當馳辭對我策章句何煒煌
相公朝服立工席歌鹿鳴禮終樂亦闋相拜送于庭之

子去須臾赫赫流盛名竊喜復竊歎諒知有所成人事
安可恒奄忽令我傷聞子高第日正從相公喪哀情逢
吉語惆悵難為雙暮宿偃師西徒展轉在牀夜聞汴州
亂遶壁行徬徨我時留妻子倉卒不及將相見不復期
零落甘所丁驕女未絕乳念之不能忘忽如在我所耳
若聞啼聲中途安得返一日不可更俄有東來說我家
免罹殃乘船下汴水東去趨彭城從喪朝至洛還走不
及停假道經盟津出入行澗岡日西入軍門羸馬顛且

僵主人願少留延入陳壺觴卑賤不敢辭忽忽心如狂
飲食豈知味絲竹徒轟轟平明脫身去決若驚鳬翔黃
昏次汜水欲過無舟航號呼久乃至夜濟十里黃中流
上灘渾沙水不可詳驚波暗合沓星宿爭翻芒轅馬蹢
躅鳴左右泣僕童甲午憇時門臨泉窺鬪龍東西出陳
許陂澤平茫茫道邊草木花紅紫相低昂百里不逢人
角角音谷雄雉鳴行行二月暮乃及徐南疆下馬步堤岸
上船拜吾兄誰云經艱難百口無天殤僕射南陽公宅

我睢水陽篋中有餘衣盎中有餘糧閉門讀書史窗戶
忽已涼日念子來遊子豈知我情別離未為久辛苦多
所經對食每不飽共言無倦聽連延三十日晨坐達五
更我友二三子宦遊在西京東野窺禹穴李翱觀濤江
蕭條千萬里會合安可逢淮之水舒舒楚山直叢叢子
又捨我去我懷焉所窮男兒不再壯百歲如風狂高爵
尚可求無為守一鄉

歐陽修曰退之雄文大手固不足論而余獨愛其用韻之工蓋其得

韻寬則波瀾橫溢入傍韻乍還乍離出入回合殆不可拘以常格如此日足可惜之類是也得韻窄則不復傍

出而因難見巧愈險愈奇如病中贈張十八之類是也
予嘗與聖俞論此以為譬如善馭良馬者通衢廣陌縱
橫馳逐惟意所之至于水曲蟻封疾徐中節而不少蹉
跌乃天下之至工也聖俞曰前史言退之為人木強若
寬韻可自足而輒傍出窄韻難獨用而反不出豈非其
拘強而然與坐客皆笑倬按二公之論雖妙然韓公自
用古韻不盡如
二公之見也

幽懷

幽懷不能寫行此春江潯適與佳節會士女競光陰凝
粧耀洲渚繁吹蕩人心間關林中鳥亦知和為音豈無
一樽酒自酌還自吟但悲時易失四序迭相侵我歌君

子行視古猶視今

落葉送陳羽

落葉不更息斷蓬無復歸飄飆終自異邂逅暫相依
悄深夜語悠悠寒月輝誰云少年別流淚各沾衣

歸彭城

天下兵又動太平竟何時訐謨者誰子無乃失所宜
前年關中旱閭井多死飢去歲東郡水生民為流屍上天
不虛應禍福各有隨我欲進短策無由至彤墀剗肝以

為紙瀝血以書辭上言陳堯舜下言引龍夔言辭多感
激文字少歲蕤一讀已自恠再尋良自疑食芹雖云美
獻御固已癡緘封在骨髓耿耿空自奇昨者到京師屢
陪高車馳周行多俊異議論無瑕疵見待頗異禮未能
去毛皮到口不敢吐徐徐俟其熾歸來戎馬間驚顧似
羈雌連日或不語終朝見相欺乘閒輒騎馬茫茫詣空
陂遇酒即酩酊君知我為誰

醉贈張祕書

徹

人皆勸我酒我若耳不聞今日到君家呼酒持勸君為
此座上客及余各能文君詩多態度藹藹春空雲東野
動驚俗天葩吐奇芬張籍學古淡軒鶴避雞羣阿買不
識字頗知書八分詩成使之寫亦足張吾軍所以欲得
酒為文俟其醺酒味既冷冽酒氣又氛氲性情漸浩浩
諧笑方云云此誠得酒意餘外徒繽紛長安衆富兒盤
饌羅羶葷不解文字飲惟能醉紅裙雖得一餉樂有如
聚飛蚊今我及數子固無猶與薰險語破鬼膽高詞媿

皇墳至寶不雕琢神功謝鋤耨方今向太平元凱承華
勛吾徒幸無事庶以窮朝曛

送惠師

惠師浮屠者乃是不羈人十五愛山水超然謝朋親脫
冠翦頭髮飛步遺蹤塵發跡入四明梯空上秋旻遂登
天台望衆壑皆嶙峋夜宿最高頂舉頭看星辰光芒相
照燭南北爭羅陳茲地絕翔走自然嚴且神微風吹木
石澎湃聞韶鈞夜半起下視溟波銜日輪魚龍驚踴躍

叫嘯成悲辛恠氣或紫赤敲磨共輪困金鷄旣騰翥六
合俄清新常聞禹穴奇東去窺甌閩越俗不好古流傳
失其真幽蹤邈難得聖路嗟長堙迴臨澗江濤屹起高
峨岷壯志死不息千年如隔晨是非竟何有棄去非吾
倫凌江詣廬嶽浩蕩極遊巡崔宰沒雲表陂陀浸湖淪
是時雨初霽懸瀑垂天紳前年往羅浮步屐南海濶大
哉陽德盛榮茂恒留春鵬騫墮長翮鯨戲側修鱗自來
連州寺曾未造城闔日携青雲客探勝窮崖濱太守邀

不去郡官請徒頻囊無一金資翻謂富者貧昨日忽不見我令訪其鄰奔波自追及把手問所因顧我却興歎君寧異于民離合自古然辭別安足珍吾聞九疑好風志今欲伸斑竹啼帝女清湘沈楚臣衡山與洞庭此固道所循尋嵩方抵洛歷華遂之秦浮游靡定處偶往即通津吾言子當去子道非吾遵江魚不池活野鳥難籠馴吾非西方教憐子狂且醇吾嫉情遊者憐子愚且諄去矣各異趣何為浪霑巾

送靈師

佛法入中國爾來六百年齊民逃賦役高士著幽禪官
吏不之制紛紛聽其然耕桑日失隸朝署時遺賢靈師
皇甫姓允胄本蟬聯少小涉書史早能綴文篇中間不
得意失跡成延遷逸志不拘教軒騰斷牽攀圍棋鬪白
黑生死隨機權六博在一擲臬盧叱迴旋戰詩誰與敵
浩汗橫戈鋌飲酒盡百觥嘲諧思逾鮮有時醉花月高
唱清且綿四座咸寂默杳如奏湘絃尋勝不憚險黔江

屢洄沿瞿塘五六月驚電讓歸船怒水忽中裂千尋墮
幽泉環迴勢益急仰見團團天投身豈得計性命甘徒
捐浪沫感翻涌漂浮再生全同行二十人魂骨俱坑填
靈師不掛懷冒涉道轉延開忠二州牧詩賦時多傳失
職不把筆珠璣為君編強留費日月密席羅嬋娟昨者
至林邑使君數開筵逐客三四公盈懷贈蘭茝湖游泛
潯沅溪宴駐潺湲別語不許出行裾動遭牽鄰州競招
請書札何翩翩十月下桂嶺乘寒恣窺緣落落王員外

爭迎獲其先自從入賓館占恹久能專吾徒頗攜被接
宿窮歡妍聽說兩京事分明在眼前縱橫雜謠俗瑣屑
咸羅穿材調真可惜朱丹枉磨研方將斂之道且欲冠
其顛韶陽李太守高步凌雲烟得客輒忘食開囊乞繒
錢手持南曹叙字重青瑤鐫古氣參差繫高標摧太玄
維舟事干謁披讀頭風痊還如舊相識傾壺暢幽悃以
此復留滯歸驂幾時鞭

縣齋有懷

少小尚奇偉平生足悲咤猶嫌子夏儒肯學樊遲稼事
業窺臯稷文章蔑曹謝濯纓起江湖綴珮雜蘭麝悠悠
指長道去去策高駕誰為傾國媒自許連城價初隨計
吏貢屢入澤宮射雖免十上勞何能一戰霸人情忌殊
異世路多權詐蹉跎顏遂低摧折氣愈下治長信非罪
侯生或遭罵懷書出皇都銜淚渡清灞身將老寂寞志
欲死閒暇朝食不盈腸冬衣纔掩骼軍書旣頻召戎馬
乃連跨大梁從相公彭城赴僕射弓箭圍狐兔絲竹羅

酒肴兩府變荒涼三年就休假求官去東洛犯雪過西
華塵埃紫陌春風雨靈臺夜名聲荷朋友援引乏姻婭
雖陪彤庭臣詎縱青冥艱寒空聳危闕曉色曜修架捐
軀辰在丁鍛翻時方措投荒誠職分領邑幸寬赦湖波
翻日車嶺石圻天罅毒霧恒熏晝炎風每燒夏雷威固
已加颶勢仍相借氣象杳難測聲音吁可怕夷言聽未
慣越俗循猶乍指摘兩憎嫌睚眦互猜訝祗緣恩未報
豈謂生足藉嗣皇新繼明率土日流化惟思滌瑕垢長

去事桑柘斲蒿開雲扃壓頰抗風榭禾麥種滿地黎棗
栽繞舍兒童稍長成雀鼠得驅嚇官租日輸納村酒時
邀迂閒愛老農愚歸弄小女姁如今便可爾何用畢婚
嫁

合江亭

紅亭枕湘江蒸水會其左瞰臨眇空闊綠淨不可唾維
昔經營初邦君實王佐翦林遷神祠買地費家貨梁棟
宏可愛結構麗匪過伊人去軒騰茲宇遂顏挫老郎來

何暮高唱久乃和樹蘭盈九畹栽竹逾萬个長綆汲滄
浪幽蹊下坎坷波濤夜俯聽雲樹朝對卧初如遺宦情
終乃最郡課人生誠無幾事往悲豈奈蕭條縣歲時契
闊繼庸懦勝事誰復論醜聲日已播中丞黜凶邪天子
閔窮餓君侯至之初閭里自相賀淹滯樂閒曠勤苦勸
慵惰為余掃塵階命樂醉衆座窮秋感平分新月憐半
破願書巖上石勿使泥塵沈

陪杜侍御遊湘西兩寺獨宿有題因獻楊常侍

長沙千里平勝地猶在險况當江濶處斗起勢匪漸深
林高玲瓏青山上琬琰路窮臺殿闕佛事煥且儼剖竹
走泉源開廓架崖广是時秋之殘暑氣尚未斂羣行忘
後先朋息棄拘檢客堂喜空涼華榻有清簟澗蔬煮蒿
芹水果剝菱芡伊余夙所慕陪賞亦云忝幸逢車馬歸
獨宿門不掩山樓黑無月漁火燦星點夜風一何喧杉
檜屢磨颭猶疑在波濤怵惕夢成魘靜思屈原沈遠憶
賈誼貶椒蘭爭妬忌絳灌共讒諂誰令悲生腸坐使淚

盈臉翻飛乏羽翼指摘因瑕玷珥貂藩維重政化類分
陝禮賢道何優奉已事苦儉大厦棟方隆巨川楫行剡
經營誠少暇遊宴固已歛旅程愧淹留徂歲嗟荏苒平
生每多感柔翰遇頻染展轉嶺猿鳴曙燈青睽睽

岳陽樓別竇司直

洞庭九州閒厥大誰與讓南匯羣崖水北注何奔放渚
為七百里吞納各殊狀自古澄不清環混無歸向炎風
日搜攪幽恠多冗長軒然大波起宇宙隘而妨

音訪巍巍

拔嵩華騰蹕較健壯聲音一何宏轟輶車萬兩猶疑帝
軒轅張樂就空曠蛟螭露筍簏縞練吹組帳鬼神非人
世節奏頗跌踢陽施見誇麗陰閉感悽愴朝過宜春口
極北缺堤障夜纜巴陵洲叢芮纔可傍星河盡涵泳俯
仰迷下上餘瀾怒不已喧聒鳴甕盎明登岳陽樓輝煥
朝日亮飛廉戢其威清晏息纖纈泓澄湛凝綠物影巧
相况江豚時出戲驚波忽蕩漭時當冬之孟隙竅縮寒
漲前臨指近岸側坐眇難望滌濯神魂醒幽懷舒以暢

主人孩童舊握手乍忻悵憐我竄逐歸相見得無恙開
筵交履烏爛漫倒家釀杯行無留停高柱送清唱中盤
進橙栗投擲傾脯醬歡窮悲心生婉孌不能忘念昔始
讀書志欲干霸王屠龍破千金為藝亦云亢愛才不擇
行觸事得讒謗前年出官由此禍最无妄公卿採虛名
擢拜識天仗姦猜畏彈射斥逐恣欺誑新恩移府庭逼
側厠諸將于嗟苦鴛鵒緩但懼失宜當追思南渡時魚腹
甘所葬嚴程迫風帆劈箭入高浪顛沉在須臾忠鯁誰

復諒生還真可喜
剋已自懲創庶從
今日後
麤識得與
喪事多改前好趣
有獲新尚誓耕十畝
田不取萬乘相
細君知蠶織稚子已
能餉行當掛其冠
生死君一訪

送文暢師北遊

昔在四門館晨有僧來謁
自言本吳人少小學城闕已
窮佛根源麤識事輓輓攀拘
屈吾真戒轄思遠發薦紳
秉筆徒聲譽耀前閥
從求送行詩屢造忍顛蹶
今成十餘卷浩汗羅斧鉞
先生閱窮巷未得窺剗剗
又聞識大

道何路補剝削出其囊中文滿聽實清越謂僧當少安
草序頗排訐上論古之初所以施賞罰下開迷惑胸襟
豁斷株檠僧時不聽瑩若飲水救渴風塵一出門時日
多如髮三年竄荒嶺守縣坐深樾徵租聚異物詭製恒
巾韞幽窮共誰語思想甚含臆昨來得京官照壁喜見
蜎况逢舊親識無不比鷄鵬長安多門戶弔慶少休歇
而能勤來過重惠安可揭當今聖政初恩澤完臧穢胡
為不自暇飄戾逐鷗鷺僕射領北門威德壓戎羯相公

鎮幽都竹帛爛勲伐酒場舞閨妹獵騎圍邊月開張篋
中寶自可得津筏從茲富裘馬寧復茹藜蕨余期報恩
後謝病老耕垞庇身指蓬茅逞志縱獫狁僧還相訪來
山藥煮可掘

答張徹

辱贈不知報我歌爾其聆首叙始識面次言後分形道
途綿萬里日月垂十齡浚郊避兵亂睢岸連門停肝膽
一古劍波濤兩浮萍漬墨竄舊史磨丹注前經義苑手

祕寶文堂耳驚寔暄晨躡露舄暑夕眠風櫺結友子讓
抗請師我慙丁初味猶噉蔗遂通斯建瓴搜竒日有富
嗜善心無寧石梁平佺佺沙水光泠泠乘枯摘野艷沈
細抽潛腥遊寺去陟巘尋徑返穿汀緣雲竹竦竦失路
麻冥冥淫潦忽翻野平蕪眇開溟防泄塹夜塞懼衝城
晝局及去事戎轡相逢宴軍伶觥秋縱兀兀獵旦馳駟
駒從賦始分手朝京忽同齡急時促暗棹戀月留虛亭
畢事驅傳馬安居守牕螢梅花灞水別宮燭驪山醒省

選速投足鄉賓尚推翎塵祛又一摻淚皆還雙熒洛邑
得休告華山窮絕陁倚巖晚海浪引袖拂天星日駕此
迴轄金神所司刑泉紳拖脩白石劍攢高青磴蘚達拳
跼梯颺颺伶傳悔狂已咋指垂誠仍鐫銘我豸忝備列
伏蒲愧分涇微誠慕橫草瑣力推撞筵疊雪走商嶺飛
波航洞庭下險疑墮井守官類拘囹荒餐茹獠蠱幽夢
感湘靈刺史肅著蔡吏人沸蝗螟點綴簿上字趨蹌閣
前鈴賴其飽山水得以娛瞻聽紫樹雕斐疊碧流滴瓏

玲映波鋪遠錦插地列長屏愁狄酸骨死恠花醉魂馨
潛苞絳實坼幽乳翠毛零赦行五百里月變三十莖漸
階羣振鷺入學誨螟蛉草甘謝鳴鹿壘滿慙罄餅罔罔
抱瑚連飛飛聯鵲鵲魚鬣欲脫背虬光先照硯豈獨出
醜類方當動朝廷勤來得晤語勿憚宿寒廳

御定全唐詩錄卷四十六

欽定四庫全書

集部

御定全唐詩錄卷四十七

詳校官左中允_臣瑋五珠

主事銜_臣徐以坤覆勘

總校官原任_臣王燕緒

校對官中書_臣嵇承志

謄錄監生_臣宋曷

欽定四庫全書

御定全唐詩錄卷四十七

韓愈

古體詩

薦士

周詩三百篇雅麗理訓誥曾經聖人手議論安敢到五
言出漢時蘓李首更號東都漸瀰漫派別百川導建安
能者七卓犖變風操遶迤抵晉宋氣象日凋耗中間數

鮑謝比近最清與齊梁及陳隋衆作等蟬噪搜春摘花
卉沿襲傷剽盜國朝盛文章子昂始高蹈勃興得李杜
萬類困陵暴後來相繼生亦各臻閫輿有窮者孟郊受
材實雄鷲冥觀洞古今象外遂幽好橫空盤硬語妥帖
力排界敷柔肆紆餘奮猛卷海潦榮華肖天秀捷疾逾
響報行身踐規矩甘辱恥媚竈孟軻分邪正眸子看瞭
眊杳然粹而清可以鎮浮躁酸寒溧陽尉五十幾何耄
孜孜營甘辛辛苦久所冒俗流知者誰指注競嘲傲聖

皇索遺逸髦士日登造廟堂有賢相愛遇均覆燾况承
歸與張二公迭嗟悼青冥送吹噓強箭射魯縞胡為久
無成使以歸期告霜風破佳菊嘉節迫吹帽念將決焉
去感物增戀嫪彼微水中苻尚煩左右芼魯侯國至小
廟鼎猶納郛幸當擇珉玉寧有棄珪瑁悠悠我之思擾
擾風中燾音道上言愧無路日夜惟心禱鶴翎不天生變
化在啄抱通波非難圖尺地易可漕善善不汲汲後時
徒悔懊救死具八珍不如一簞藹微詩公勿誚愷悌神

所勞

喜侯喜至贈張籍張徹

昔我在南時數君長在念搖搖不可止諷詠日喁噲如
以膏濯衣每漬垢逾染又如心中疾箴石非所砭常思
得遊處至死無倦厭地遐物奇怪水鏡涵石劒荒花窮
漫亂幽獸工騰閃礙目不忍窺忽忽坐昏墊逢神多所
祝豈忘靈即驗依依夢歸路歷歷想行店今者誠自幸
所懷無一欠孟生去雖索侯氏來還歟鼓眠聽新詩屋

角月豔豔雜作承間騁交驚舌互譔續紛指瑕疵拒捍
阻城塹以余經摧挫固請發鉛槧居然妄推讓見謂蕪
天跋比陳語徒妍悚息不敢占呼奴具盤飧釘餌魚菜
贍人生但如此朱紫安足僭

駑驥

唐本有贈歐陽詹字或作駑驥吟示
歐陽詹詹集有答韓十八駑驥吟

駑駘誠齷齪市者何其稠力小苦易制價微良易酬渴
飲一斗水飢食一束芻嘶鳴當大路志氣若有餘驥驥
生絕域自矜無匹儔牽驅入市門行者不為留借問價

幾何黃金比嵩丘借問行幾何咫尺視九州飢食玉山
未渴飲醴泉流問誰能為御曠世不可求惟昔穆天子
乘之極遐遊王良執其轡造父挾其輶因言天外事茫
惚使人愁駑駘謂騏驥餓死余爾羞有能必見用有德
必見收孰云時與命通塞皆自由騏驥不敢言低徊但
垂頭人皆劣騏驥共以駑駘優喟余獨興歎才命不同
謀寄詩同心字為我商聲謳

齷齪

齷齪當世士所憂在飢寒但見賤者悲不聞貴者嘆大
賢事業異遠抱非俗觀報國心皎潔念時涕汎瀾妖姬
坐左右柔指發哀彈酒肴雖日陳感激寧為歡秋陰欺
白日泥潦不少乾河堤決東郡老弱隨驚湍天意固有
屬誰能詰其端願辱太守薦得充諫諍官排雲叫閭闔
披腹呈琅玕致君豈無術自進誠獨難

洞庭湖阻風贈張十一署

十月陰氣盛北風無時休蒼茫洞庭岸與子維雙舟霧

雨晦爭泄波濤怒相投犬雞斷四聽糧絕誰與謀相去
不容步險如礙山丘清談可以飽夢想接無由男女喧
左右飢啼但啾啾非懷北歸興何用勝羈愁雲外有白
日寒光自悠悠能令暫開霽過是吾無求

縣齋讀書

出宰山水縣讀書松桂林蕭條捐末事邂逅得初心哀
狷醒俗耳清泉潔塵襟詩成有共賦酒熟無孤斟青竹
時默釣白雲日幽尋南方本多毒北客恒懼侵謫譴甘

自守滯留愧難任投章類縞帶佇答逾魚金

新竹

筍添南階竹日日成清閥縹節已儲霜黃苞猶掩翠出
欄抽五六當戶羅三四高標陵秋嚴貞色奪春媚稀生
巧補林併出疑爭地縱橫乍依行爛漫忽無次風枝未
飄吹露粉先涵淚何人可携翫清景空瞪視

落齒

去年落一牙今年落一齒俄然落六七落勢殊未已餘

存皆動搖盡落應始止憶初落一時但念豁可恥及至
落二三始憂衰即死每一將落時懍懍恒在已又牙妨
食物顛倒怯漱水終焉捨我落意與崩山比今來落既
熟見落空相似餘存二十餘次第知落矣儻常歲落一
自足支兩紀如其落併空與漸亦同指人言齒之落壽
命理難恃我言生有涯長短俱死爾人言齒之豁左右
驚諦視我言莊周云木鴈各有喜語訛默固好嚼廢輒
還美因歌遂成詩持用詫妻子

苦寒

四時各平分一氣不可兼隆寒奪春序顓頊固不廉太
昊弛維綱畏避但守謙遂令黃泉下萌芽天勾尖草木
不復抽百味失苦甜凶飈攪宇宙銚刀甚割砭日月雖
云尊不能活烏蟾羲和送日出恇怯頻窺覘炎帝持祝
融呵噓不相炎而我當此時恩光何由沾肌膚生鱗甲
衣被如刀鑱氣寒鼻莫鼻血凍指不沾濁醪沸入喉口
角如銜箝將持匕箸食觸指如排籤侵鑪不覺暖熾炭

屢已添探湯無所益何況續與鱣虎豹僵穴中蛟螭死
幽潛熒惑喪躔次六龍冰脫髯芒碭大包内生類恐盡
殲啾啾牕間雀不知已微纖舉頭仰天鳴所願晷刻淹
不如彈射死卻得親魚燂鸞皇苟不存爾固不在占其
餘蠢動儔俱死誰恩嫌伊我稱最靈不能女覆苦悲哀
激憤嘆五藏難安恬中宵倚牆立淫淚何漸漸天王哀
無辜惠我下顧瞻褰旒去耳續調和進梅鹽賢能日登
御黜彼傲與憊生風吹死氣豁達如褰簾懸乳零落墮

晨光入前簷雪霜頓銷釋土脈膏且黏豈徒蘭蕙榮施
及艾與蕪日萼行鑠鑠風條坐檐檐天乎苟其能吾死
意亦厭

崔十六少府攝伊陽以詩及書見投因酬三十韻
崔君初來時相識頗未慣但聞赤縣尉不比博士慢賃
屋得連牆往來忻莫間我時亦新居觸事苦難辦蔬飧
要同喫破襖請來綻謂言安堵後貸借更何患不知孤
遺多舉族仰薄宦有時未朝餐得米日已晏隔牆聞誰

呼衆口極驚鴈前計頓乖張居然見真贋嬌兒好眉眼
袴脚凍兩胛捧書隨諸兄累累兩角巾冬惟茹寒齋秋
始識瓜瓣問之不言飢飫若厭芻豢才名三十年久合
居給諫白頭趨走裏閉口絕謗訕府公舊同袍拔擢宰
山澗寄詩雜詼俳有類說鵬鸚上言酒味酸冬衣竟未
撰下言人吏稀惟足彪與彪又言致猪鹿此語乃善幻
三年國子師腸肚習藜苳况住洛之涯魴鱖可罩汕肯
效屠門嚼久嫌弋者篡謀拙日焦拳活計似鋤耨男寒

澁詩書妻瘦剗腰襟為官不事職厥罪在欺謾行當自
劾去漁釣老葭蕀歲窮寒氣驕冰雪滑磴棧音問難屢
通何由覲清盼

送侯叅謀赴河中幕

憶昔初及第各以少年稱君願始生鬚我齒清如冰爾
時心氣壯百事謂已能一別詎幾何忽如隔晨興我齒
豁可鄙君顏老可憎相逢風塵中相視迭嗟矜幸同學
省官末路再得朋東司絕教授遊宴以為恒秋漁蔭密

樹夜博然明燈雪逕抵樵叟風廊折談僧陸渾桃花間
有湯沸如烝三月崧少步躑躅紅千層洲沙厭晚坐嶺
壁窮晨昇沈冥不計日為樂不可勝遷滿一已異乖離
坐難憑行行事結束人馬何躊躇感激生膽勇從軍豈
嘗曾沈沈司徒公天子爪與肱提師十萬餘四海欽風
稜河北兵未進蔡州帥新薨曷不請掃除活彼黎與烝
鄙夫誠怯弱受恩愧徒弘猶思脫儒冠棄死取先登又
欲面言事上書求詔徵侵官固非是妄作譴可懲惟當

待責免耕斲歸溝塍今君得所附勢若脫鞴鷹檄筆無
與讓幕謀職其膺收績開史牒翰飛逐溟鵬男兒貴立
事流景不可乘歲老陰沴作雲頽雪翻崩別袖拂洛水
征車轉峻陵勤勤酒不進勉勉恨已仍送君出門歸愁
腸若牽繩默坐念語笑癡如遇寒蠅策馬誰可適晤言
誰為應席塵惜不掃殘罇對空凝信知後會時日月屢
環絙生期理行役歡緒絕難承寄書惟在頻無恹簡與
繒

東都遇春

少年氣真狂有意與春競行逢二三月九州花相映川
原曉服鮮桃李晨妝靚荒乘不知疲醉死豈辭病飲噉
惟所便文章倚豪橫爾來曾幾時白髮忽滿鏡舊遊喜
乖張新輩足嘲評去聲心腸一變化羞見時節盛得閒無
所作貴欲辭視聽深居疑避仇默卧如當暝朝曦入牖
來鳥喚昏不醒為生鄙計算鹽米告屢罄坐疲都忘起
冠側懶復正幸蒙東都官獲離機與牢乖慵遭傲僻漸

染生弊性既去焉能追有來猶莫聘有舩魏王池往往
縱孤泳水容與天色此處皆綠淨岸樹共紛披渚牙相
緯經音徑懷歸苦不果即事取幽迸貪求匪名利所得亦
已併悠悠度朝昏落落捐季孟羣公一何賢上戴天子
聖謀謨收禹績四面出雄勁轉輸非不勤稽逋有軍令
在庭百執事奉職各祗敬我獨何為哉坐與億兆慶譬
如籠中鳥仰給活性命為詩告友生負愧終究竟

送石處士赴河陽幕

長把種樹書人云避世士忽騎將軍馬自號報恩子風
雲入壯懷泉石別幽耳鉅鹿師欲老常山險猶恃豈惟
彼相憂固是吾徒恥去去事方急酒行可以起

送湖南李正字歸

長沙入楚深洞庭值秋晚人隨鴻雁少江共薰葭遠歷
歷余所經悠悠子當返孤遊懷耿介旅宿夢婉婉風土
稍殊音魚蝦日異飯親交俱在此誰與同息偃

送無本師歸范陽

無本於為文身大不及膽吾嘗示之難勇往無不敢蛟
龍弄角牙造次欲手攬衆鬼囚大幽下覩襲元霄天陽
熙四海注視首不頷鯨鵬相摩宰兩舉快一噉夫豈能
必然固已謝黠黠狂詞肆滂葩低昂見舒慘姦窮恠變
得徃徃造平澹蜂蟬碎錦纈綠池披菡萏芝英擢荒蓁
孤翮起連茭家住幽都遠未識氣先感來尋吾何能無
殊嗜昌歎徂感切始見洛陽春桃枝綴紅糝遂來長安里
時卦轉習坎老懶無鬪心久不事鉛槧欲以金帛酬舉

首常顧領念當委我去雪霜刻以懣惇飈攪空衢天地
與頓撼勉率吐歌詩慰女別後覽

雙鳥詩

雙鳥海外來飛飛到中州一鳥落城市一鳥集巖幽不
得相伴鳴爾來三千秋兩鳥各閉口萬象街口頭春風
卷地起百鳥皆飄浮兩鳥忽相逢百日鳴不休有耳聒
皆聾有口反自羞百舌舊饒聲從此恒低頭得病不呻
喚泯默至死休雷公告天公百物須膏油自從兩鳥鳴

聒亂雷聲收鬼神怕嘲咏造化皆停留草木有微情挑
抉示九州蟲鼠誠微物不堪苦誅求不停兩鳥鳴百物
皆生愁不停兩鳥鳴自此無春秋不停兩鳥鳴日月難
旋轉不停兩鳥鳴大法失九疇周公不為公孔丘不為
丘天公恠兩鳥各捉一處囚百蟲與百鳥然後鳴啾啾
兩鳥既別處閉聲省愆尤朝食千頭龍暮食千頭牛朝
飲河生塵暮飲海絕流還當三千秋更起鳴相酬

嘲魯連子

魯連細而黠有似黃鸝子田巴兀老蒼憐汝矜爪觜開
端要驚人雄誇吾厭矣高拱禪鴻聲若輟一盃水獨稱
唐虞賢顧未知之耳

調張籍

李杜文章在光焰萬丈長不知羣兒愚那用故謗傷虬
蟬撼大樹可笑不自量伊我生其後舉頭遙相望夜夢
多見之晝思反微茫徒觀斧鑿痕不矚治水航想當施
手時巨刃摩天揚垠崖剗崩豁乾坤擺雷礪惟此兩夫

子家居率荒涼帝欲長吟哦故遣起且僵翦翎送籠中
使看百鳥翔平生千萬篇金薤垂琳琅仙官勅六丁雷
電下取將流落人間者太山一豪芒我願生兩翅捕逐
出八荒精誠忽交通百恠入我腸刺手拔鯨牙舉瓢酌
天漿騰身跨汗漫不著織女褰顧語地上友經營無太
忙乞君飛霞珮與我高頡頏

雜詩

古史散左右詩書置後前豈殊蠹書蟲生死文字間古

道自愚蠢古言自包經當今固殊古誰與為欣歡獨攜
無言子共昇崑崙顛長風飄襟裾遂起飛高圓下視禹
九州一塵集豪端遨嬉未云幾下已億萬年向者夸奪
子萬墳厭其巔惜哉抱所見白黑未及分慷慨為悲咤
淚如九河翻指摘相告語雖還今誰親翩然下大荒被
髮騎騏驎

寄崔二十六立之

西城員外丞心跡兩屈奇往歲戰詞賦不將勢方隨下

驢入省門左右驚紛披傲兀坐試席深叢見孤羆文如
翻水成初不用意為四座各低面不敢捩眼窺升階揖
侍郎歸舍日未敝佳句喧衆口考官敢瑕疵連年收科
第若摘領底髭迴首卿相位通途無他岐豈論校書郎
袍笏光參差童稚見稱說祝身得如斯儕輩妬且熱喘
如竹筒吹老婦願嫁女約不論財貲老翁不量分累月
答其兒攪攪爭附託無人角雄雌由來人間事翻覆不
可知安有巢中鷲插翅飛天陸駒羸著爪牙猛虎借與

皮汝頭有韁繫汝脚有索縻陷身泥溝間誰復稟指撝
不脫吏部選可見偶與奇又作朝士貶得非命所施客
居京城中十日營一炊逼迫走巴蠻恩愛座中離昨來
漢水頭始得完孤羈桁掛新衣裳益棄食殘糜苟無飢
寒苦那用分高卑憐我還好古宦途同險巇每旬遺我
書竟歲無差池新篇奚其思風幡肆逶迤又論諸毛功
劈水看蛟螭雷電生睽睨角鬣相撐披屬我感窮景抱
華不能摘倡來和相報愧歎俾我疵又寄百尺綵緋紅

相盛衰巧能喻其誠深淺抽肝脾開展放我側方餐涕
垂匙朋交日凋謝存者逐利移子寧獨迷誤綴綴意益
彌舉頭庭樹豁狂飈卷寒曦迢遞山水隔何由應墳簏
別來就十年君馬記騶驪長女當及事誰助出悅縞諸
男皆秀朗幾能守家規文字銳氣在輝輝見旌麾摧腸
與感容能復持酒卮我雖未耄老髮禿骨力羸所餘十
九齒飄飄盡浮危玄花著两眼視物隔襪襪燕席謝不
詣游鞍懸莫騎敦敦都回切凭書案譬彼鳥黏繻且吾聞

之師不以物自墮孤豚眠糞壤不慕太廟犧君看一時人
幾輩先騰馳過半黑頭死陰蟲食枯髀歡華不滿眼咎
責塞兩儀觀名計之利詎足相陪裨仁者恥貪冒受祿
量所宜無能食國惠豈異哀癘罷久欲辭謝去休令衆
睢睢况又嬰疹疾寧保軀不貲不能前死罷內實慙神
祇舊籍在東都茅屋枳棘籬還歸非無指灞渭揚春澌
生兮耕吾疆死也埋吾陂文書自傳道不仗史筆垂夫
子固吾黨新恩釋銜羈去來伊洛上相待安罽罽我有

雙飲觥其銀得朱提黃金塗物象雕鐫妙工倅乃令千
里鯨么麼微螽斯猶能爭明月擺掉出渺瀰野草花葉
細不辨蕒萊施縣縣相糾結狀似環城陣四隅芙蓉樹
擢豔皆猗猗鯨以興君身失所逢百罹月以喻夫道匱
俛勵莫虧草木明覆載妍醜齊榮萎願君恒御之行止
雜燧觴異日期對舉當如合分支

符讀書城南

木之就規矩在梓匠輪輿人之能為人由腹有詩書詩

書勤乃有不勤腹空虛欲知學之力賢愚同一初由其不能學所入遂異間兩家各生子提孩巧相如少長聚嬉戲不殊同隊魚年至十二三頭角稍相踈二十漸乖張清溝映汙渠三十骨骼成乃一龍一豬飛黃騰踏去不能顧蟾蜍一為馬前卒鞭背生蟲蛆一為公與相潭潭府中居問之何因爾學與不學歟金璧雖重寶費用難貯儲學問藏之身身在則有餘君子與小人不繫父母且不見公與相起身自犂鉏不見三公後寒飢出無

驢文章豈不貴經訓乃菑畲潢潦無根源朝滿夕已除
人不通古今馬牛而襟裾行身陷不義况望多名譽時
秋積雨霽新涼入郊墟燈火稍可親簡編可卷舒豈不
旦夕念為爾惜居諸恩義有相奪作詩勸躊躇

示爽

宣城去京國里數逾三千念汝欲別我解裝具盤筵日
昏不能散起坐相引牽冬夜豈不長達旦燈燭然座中
悉親故誰肯捨汝眠念汝將一身西來曾幾年名科掄

衆俊州考俱吏前令從府公召府公又時賢時輩千百
人孰不謂汝妍汝來江南近里閭故依然昔日同戲兒
看汝立路邊人生但如此其實亦可憐吾老世味薄因
循致留連強顏班行內何實非罪慙才短難自力懼終
莫洗前臨分不汝誑有路即歸田

人日城南登高

初正候纔兆涉七氣已弄靄靄野浮陽暉暉水披凍聖
朝身不廢佳節古所用親交既許來子姪亦可從盤蔬

冬春雜罇酒清濁共令微前事為觴味新詩送扶杖凌
圯趾刺船犯枯葑戀池羣鴨迴釋嶠孤雲縱人生本坦
蕩誰使妄倥偬直指桃李闌幽尋寧止重

病鴟

屋東惡水溝有鴟墮鳴悲青泥揜兩翅拍拍不得離羣
童叫相召瓦礫爭先之計校生平事殺却理亦宜奪攘
不愧恥飽滿盤天嬉晴日占光景高風送追隨遂凌紫
鳳羣肯顧鴻鵠卑今者運命窮遭逢巧九兒中汝要害

處汝能不得施於吾乃何有不忍棄其危丐汝將死命
浴以清水池朝餐輟魚肉暝宿防狐狸自知無以致蒙
德久猶疑飽入深竹叢飢來傍階基亮無責報心固以
聽所為昨日有氣力飛跳弄籥籬今晨忽徑去曾不報
我知傲倖非汝福天衢汝休窺京城事彈射豎子豈易
欺勿諱泥坑辱泥坑乃良規

龍吏

南行逾六旬始下昌樂瀧險惡不可狀船石相舂撞往

問龍頭吏潮州尚幾里行當何時到土風復何似
龍吏垂手笑官何問之愚譬官居京邑何由知東吳
東吳遊宦鄉官知自有由潮州底處所有罪乃竄流
儂幸無負犯何由到而知官今行自到那遽妄問為
不虞卒見困汗出愧且駭吏曰聊戲官儂嘗使往罷
嶺南大抵同官去道苦遠下此三千里有州始名潮
惡溪瘴毒聚雷電常洶洶鱷魚大於船牙眼怖殺儂
州南數十里有海無天地颶風有時作掀簸真差音事
聖人於天下於物無

不容比聞此州囚亦有生還儂官無嫌此州固罪人所
徙官當明時來事不待說委官不自謹慎宜即引分往
胡為此水邊神色久懍慌視大駢矍小所任自有宜官
何不自量滿溢以取斯工農雖小人事業各有守不知
官在朝有益國家不得無虱其間不武亦不文仁義飾
其躬巧姦敗羣倫叩頭謝吏言始慙今更羞歷官二十
餘國恩並未酬凡吏之所訶嗟實頗有之不即金木誅
敢不識恩私潮州雖云遠雖惡不可過於身實已多敢

不持自賀

贈別元十八協律

英英桂林伯實維文武特遠勞從事賢來弔逐臣色南
裔多山海道里屢紆直風波無程期所憂動不測子行
誠艱難我去未窮極臨別且何言有淚不可拭

吾友柳子厚其人藝且賢吾未識子時已覽贈子篇寤
寐想風采於今已三年不意流竄路旬日同食眠所聞
昔已多所得今過前如何又須別使我抱悵悵

勢要情所重排斥則埃塵骨肉未免然又況四海人疑
疑桂林伯矯矯義勇身生平所未識待我逾交親遺我
數幅書繼以藥物珍藥物防瘴癘書勸養形神不知四
罪地豈有再起辰窮途致感激肝膽還輪囷

寄書龍城守君驥何時秣峽山逢颶風雷電助撞捽乘
潮簸扶胥近岸指一髮兩巖雖云牢木石互飛發屯門
雖云高亦映波浪沒余罪不足惜子生未宜忽胡為不
忍別感謝情至骨

初南食貽元十八協律

鱖實如惠文骨眼相負行蠔相黏為山百十各自生蒲
魚尾如蛇口眼不相營蛤即是蝦蟇同實浪異名章舉
馬甲柱鬪以恠自呈其餘數十種莫不可嘆驚我來禦
魑魅自宜味南烹調以鹹與酸芼以椒與橙腥臊始發
越咀吞面汗驛惟蛇舊所識寧憚口眼穉開籠聽其去
鬱屈尚不平賣爾非我罪不屠豈非情不祈靈珠報幸
無嫌怨并聊歌以記之又以告同行

宿曾江口示姪孫湘

雲昏水奔流天水漭相圍三江滅無口其誰識涯圻暮
宿投民村高處水半扉犬雞俱上屋不復走與飛篙舟
入其家暝聞屋中啼問知歲常然哀此為生微海風吹
寒晴波揚衆星輝仰視北斗高不知路所歸

答柳州食蝦蟆

蝦蟆雖水居水特變形貌強號為蛙蛤於實無所校雖
然兩股長其奈脊皴皴跳踞雖云高意不離潭淖鳴聲

相呼和無理祇取鬧周公所不堪灑灰垂典教我弃愁
海濱恒願眠不覺叵堪朋類多沸耳作驚爆端能敗笙
磬仍工亂學校雖蒙句踐禮竟不聞報效大戰元鼎年
孰強孰敗橈居然當鼎味豈不辱釣罩余初不下喉近
亦能稍稍常懼染蠻夷失平生好樂而君復何為甘食
比豢豹獵較務同俗全身斯為孝哀哉思慮深未見許
迴懼

除官赴闕至江州寄鄂岳李大夫

盆城去鄂渚風便一日耳不枉故人書無因帆

去聲

江水

故人辭禮闈旌節鎮江圻而我竄逐者龍鍾初得歸別
來已三歲望望長迢遞咫尺不相聞平生那可計我齒
落可盡君鬢白幾年皆過半百來日苦無多少年樂
新知衰暮思故友譬如親骨肉寧免相可不我昔實愚
蠢不能降色辭子犯亦有言臣猶自知之公其務貫過
我亦請改事桑榆儻可收願寄相思字

南山有高樹行贈李宗閔

南山有高樹花葉何衰衰上有鳳凰巢鳳凰乳且棲四
旁多長枝羣鳥所託依黃鵠據其高衆鳥接其卑不知
何山鳥羽毛有光輝飛飛擇所處正得衆所希上承鳳
凰恩自期永不衰中與黃鵠羣不自隱其私下視衆鳥
羣汝徒竟何為不知挾丸子心默有所規彈汝枝葉間
汝翅不覺摧或言由黃鵠黃鵠豈有之慎勿猜衆鳥衆
鳥不足猜無人語鳳凰汝屈安得知黃鵠得汝去婆娑
弄毛衣前汝下視鳥各議汝瑕疵汝豈無朋匹有口莫

肯開汝落蒿艾間幾時復能飛
哀哀故山友中夜思汝
悲路遠翅翎短不得持汝歸

猛虎行

猛虎雖云惡亦各有匹儕羣行深谷間百獸望風低身
食黃熊父子食赤豹麋擇肉於熊豹肯視兔與狸正晝
當谷眠眼有百步威自矜無當對氣性縱以乖朝怒殺
其子暮還食其妃匹儕四散走猛虎還孤棲狐鳴門兩
旁烏鵲從噪之出逐猴入居虎不知所歸誰云猛虎惡

中路正悲啼
豹來銜其尾
熊來攫其頤
猛虎死不辭
但慙前所為
虎坐無助死
况如汝細微
故當結以信
親當結以私
親故且不保
人誰信汝為

感春

偶坐藤樹下
暮春下旬間
藤蔭已可庇
落葉還漫漫
疊新葉大瓏
瓏晚花乾青
天高寥寥兩
蝶飛翻翻時
節適當爾懷
悲自無端

黃黃蕪菁花
桃李事已退
狂風簸枯榆
狼籍九衢內
春

序一如此汝顏安足賴誰能駕飛車相從觀海外

晨遊百花林朱朱兼白白柳枝弱而細懸樹垂百尺左
右同來人金紫貴顯劇嬌童為我歌哀響跨箏笛豔姬
蹋筵舞清眸刺劍戟心懷平生友莫一在燕席死者長
眇芒生者困乖隔少年真可喜老大百無益

南內朝賀歸呈同官

薄雲蔽秋曦清雨不成泥罷賀南內衙歸涼曉淒淒綠
槐十二街渙散馳輪蹄余惟覲書生孤身無所齎三黜

竟不去致官九列齊豈惟一身榮珮玉冠簪犀滉蕩天
門高著籍朝厭妻文才不如人行又無町畦問之朝廷
事畧不知東西況于經籍深豈究端與倪君恩太山重
不見酬稗穉所職事無多又不自提撕明庭集孔鸞曷
取於鳬鷺樹以松與栢不宜間蒿藜婉孌自媚好幾時
不見擠貪食以忘軀尠不調鹽醢法吏多少年磨淬出
角圭將舉汝愆尤以為已階梯收身歸闕東期不到死
迷

讀東方朔雜事

嚴嚴王母宮下維萬仙家噫欠為飄風濯手大雨沱方
朔乃豎子驕不加禁訶偷入雷電室輶輳掉狂車王母
聞以笑衛官助呀呀不知萬萬人生身埋泥沙簸頓五
山踣流漂八維蹉曰吾兒可憎奈此狡獪何方朔聞不
喜褫身絡蛟蛇瞻相北斗柄兩手自相掣羣仙急乃言
百犯庸不科向觀睥睨處事在不可赦音奢欲不布露言
外口實諠譁王母不得已顏頰口齋嗟頷頭可其奏送

以紫玉珂方朔不懲創挾恩更矜誇詆欺劉天子正晝
溺殿衙一旦不辭訣攝身凌蒼霞

譴瘧鬼

屑屑水帝魂謝謝無餘輝如何不肖子尚奮瘧鬼威乘
秋作寒熱翁嫗所罵譏求食歐泄間不知臭穢非醫師
加百毒熏灌無停機灸師施艾炷酷若獵火圍詛師毒
口牙舌作霹靂飛符師弄刀筆丹墨交橫揮咨汝之胄
出門戶何巍巍祖軒而父頊未沫於前徽不修其操行

賤薄似汝稀豈不忝厥祖覲然不知歸湛湛江水清歸
居安汝妃清波為裳衣白石為門畿呼吸明月光手掉
芙蓉旂降集隨九歌飲芳而食菲贈汝以好辭出汝去
莫違

示兒

始我來京師止攜一束書辛勤三十年以有此屋廬此
屋豈為華于我自有餘中堂高且新四時登牢蔬前榮
饌賓親冠婚之所於庭內無所有高樹八九株有藤婁

絡之春華夏陰敷東堂坐見山雲風相吹噓松果連南
亭外有瓜芋區西偏屋不多槐榆翳空虛山鳥旦夕鳴
有類澗谷居主婦治北堂膳服適戚疎恩封高平君子
孫從朝裾開門問誰來無非卿大夫不知官高卑玉帶
懸金魚問客之所為我冠講唐虞酒食罷無為棊槊以
相娛凡此座中人十九持鈞樞又問誰與頻莫與張樊
如來過亦無事考評道精麤蹢躅學子墻屏日有徒
以能問不能其蔽豈可祛嗟我不修飾事與庸人俱安

能坐如此比肩于朝儒詩以示兒曹其無迷厥初

庭楸

庭楸止五株共生十步間各有藤繞之上各相鉤聯下
葉各垂地樹顛各雲連朝日出其東我常坐西偏夕日
在其西我常坐東邊當晝日在上我在中央間仰視何
青青上不見纖穿朝暮無日時我且八九旋濯濯晨露
香明珠何聯聯夜月來照之萋萋自生煙我已自頑鈍
重遭五楸牽客來尚不見肯到權門前權門衆所趨有

客動百千九牛亡一毛未在多少間往既無可顧不往
自可憐

送諸葛覺往隨州讀書

鄴侯家多書插架三萬軸一一懸牙籤新若手未觸為
人強記覽過眼不再讀偉哉羣聖文磊落載其腹行年
餘五十出守數已六京邑有舊廬不容久食宿臺閣多
官員無地寄一足我雖官在朝氣勢日局縮屢為丞相
言雖懇不見錄送行過滌水東望不轉目今子從之遊

學問得所欲入海觀龍魚矯翮逐黃鵠勉為新詩章月
寄三四幅

南溪始泛

榜舟南山下上不得返幽事隨去多孰能量近遠陰
沈過連樹藏昂抵橫坂石廳肆磨礪波惡厭牽挽或倚
偏岸漁竟就平洲飯點點暮雨飄稍稍新月偃餘年懍
無幾休日愴已晚自是病使然非由取高蹇

南溪亦清駛而無楫與舟山農驚見之隨我觀不休不

惟兒童輩或有杖白頭饋我籠中瓜勸我此淹留我云
以病歸此已頗自由幸有用餘俸置居在西疇因倉米
穀滿未有旦夕憂上去無得得下來亦悠悠但恐煩里
閭時有緩急投願為同社人雞豚燕春秋

足弱不能步自宜收朝蹟羸形可輿致佳觀安可擲即
此南坂下久聞有水石拖舟入其間溪流正清激隨波
吾未能峻瀨乍可刺鷺起若導吾前飛數十尺亭亭柳
帶沙團團松冠壁歸時還盡夜誰謂非事役

御定全唐詩錄卷四十七